



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8 Yangia anidakangma : Tir Yimym tir_yimym

tir yimym TAPAK 7

Uthappa lenisüba nung India team Hong Kong sixes asayamung asayatsü

Harris-i la indang medical report sangdongogo

VOL. XXII ISSUE NO. 05 (ADOK 05) DIMAPUR TENTONÜ (MONDAY) MONGPUTENI (OCTOBER) 14, 2024 ₹ 5.00

Dimapur Police-i nisung 2 aputsü bushir



Kheveni T. Yepthomi



Ilhovi @ Kimeyeto

Dimapur, October 14, 2024 (TYO): Dimapur Police-i NSCN-K (Nikki) Kilonser ka aser la den yariteper ka indang osang agütsür mesüra tena apuba nung yariteper tem nem senpet agütsütsü metetdaksüogo.

Iba ya Dimapur East Police Station nung benoka aliba ken o atema lir aser osang agütsürtem tenung miimbanga ayutsü ta Commissioner of Police, Dimapur-i sangdong ka nung ashi.

Dimapur Police-i aputsü bushiba nisung anaji NSCN-K (Nikki) Kilonser Kheveni T. Yepthomi (50 Yrs) aser la den yariteper Ilhovi @ Kimeyeto na lir.

Asür Toniho Yepthomi'er jala Kheveni ya Near Hindi College, Padumphukhuri, Dimapur anasa alir aser Ilhovi ya Zunheboto district kübok Natha nung lir ta Commissioner of Police-isa metetdaksü.

Iba dak sendakba osang agütsürtemi Dimapur Police Commissionerate nung tsünglanglen agüja alirtem ketdangsürtem den tongteptsü akok.

1. CP Dimapur - 7085055001
2. DCP Dimapur - 7085055002
3. ADCP Dimapur - 7085055048
4. ACP Dimapur - 7085055010
5. OC East PS Dimapur - 7085055020

Assam nung kaketshirtemi sobaliba mesüra tamangba yimsü otia benshitsü

Guwahati, October 13, 2024 (Agencies): Assam sorkari tawa tu school tem dang benjung mapang kaketshirtemi 'rakhis mesüra tilaks' enoktsü mela-ang ta tetuyuba agütsüogo.

State sorkarisa tanga sobaliba aser tamangba yimsü maitsütem amshidaksütsü temelaba agütsüogo.

August 8, 2024 nü National Commission for Protection of Child Rights' (NCPCR) advisory ka nung school temi kaketshirtem temeten akhümtsübuttsü aser parnok sobaliba aser tamangba maitsü beshidakjang ta shia liasü. Iba nung ajemdaker Assam sorkari tetuyuba agütsüogo.

"Kaketshirtemi benshitsü noktangka school tesayurtem aser tanga staff temi pei pei sobaliba aser tamangba yimsü inyakyim beshir. Anungji October 1 nungi school ajaki tetuyuba sülen anidaksü ozüing agütsür" ta School Education Department nung Deputy Secretary Aditi Barman-i ashi.

"State sorkari iba tetuyuba agütsüba pusema nungiter. Christian missionary school temi temzüing inyakyim sensatsür aser

Constitution of India sülen manidaker" ta Assam nung Hindutva lennir Satya Ranjan Borah-i ashi.

Indian Constitution nung Arla 51A ajanga senso ajak tsüing dang putepa alitsü aser adianu ama alitsü ashir. Constitution-i ibala mapa inyaksü ozüing agütsür aser nisung ajaki tashi angaa anidaksüla ta Borah-i ashi.

Education Policy tasenba ajanga Class 8 tashi kaketshirtem dang tetsü oshi sayutsü aser India indang shisatsü agütsütsü ashir ta paisa ashi.

"Indian Constitution anema inyakbaji linük anema inyakba den kasa lir. Kaketshirtem nem pei tamangba yimsü sülen anidaksü memulungbaji tanur temeten anema lir" ta paisa ashi.

Assamese kaketshirtemi school nung pei tetsü oshi jembiba atema merenshir aser ibaji talisa Christian missionary rejutem nung ataloker. Item school nung Assamese ya alternative language ka ama züingdaksür. Iba tebilemstsü atema Chief Minister Himanta Biswa Sarma dangi shidi ka züluogo ta Borah-i metetdaksü.

BAN-i tashiyim agi sen meshiba aser nisung apuba aitsür

Dimapur, October 14, 2024 (TYO): NSCN (NIKI)-i tawa nisungtem pur aoba aser amokmerenba aitsür ta Business Association of Nagas (BAN)-i metetdaksüogo.

Ibala inyakyim ajanga Naga nung asoshi tajung kecha bentsür maru saka telemsa ang adokdaksüogo aser asen state sensaktiai idaktsüogo. Iba ama inyakyim metentsü kuli kecha mali ta BAN-i ashi.

"Naga nung ajak külemi yimjung nung alitsü temeten lir. Khristan tesayubatem nung ajemdaker asenok taküm liyonga aotsüla saka Khristan tesayubatem sülen anidaker ta shia ochimashi, tashiyim agi sen saruba aser temenen mapa inyaka taküm liyonga maotsüla" ta BAN-i sangdong ka nung ashi.

"BAN-i Naga entrepreneurs aser shishilembartem ajungkettsü aser nungittsü atema bendanga agüja inyaker. Nagaland state rongsenketzüing jenjang tajungba

kümdaktsütsü atema onoki inyaker saka kodaser teloktemi pei nisungtem dang tashiyim agi sen meshir aser pur aoer? Ibala inyakyim ajanga lanur entrepreneurs temulung moludaktsür aser mapa meinyaker. Ochimashi, tashiyim agi sen saruba aser nisung apuba inyakyimtem ajanga asen state amokbanga meyudaktsütsü" ta parnokisa ashi.

Tanü onoki ola madoki dang yutsüra lanuputui onok dang mepelatsü. Rongsenketzüing maongkatem magütsüi parnok teimla samatsüba atema onok dang jashitsü. Mapa adokertem kümdaktsütsü atema asen lanurtem nem maongka agütsütsüla. Onoki tanü atema masü saka tarutsü dak rangloker inyaker, ta BAN-isa ashi.

Telungpur mesüra temapur süang, meranga inyaker, ochishirtem aser taküm asüngteta alirtem dang nungi onoki angazütsü mulunga lir,

saka kar dak nungi dang meshia alir, ochimashi mesüra meshimetsür ama alirtem asoshi talidak mali. Naga entrepreneurs-i pei atema dang masü saka state renlokttsü atema teinyaktsü tulu lir kechiyong asen tarutsü tangari meyanglutsütsü, ta parnokisa metetdaksüogo.

Nisungpur aoba nung shilem agir ajak aputsü onoki akhanger aser telok ajaki ceasefire agreements nung lateta aliba sülen anidaksüla. Ceasefire agreements nung lateta aliba dak alia inyakba teloki tebilemstsü khuret abentsü aser iba atema inyakba lennirtem dak langka danga atalokra Naga nung shishilembartem anema noktaksü, ta BAN-isa tekümdangtsü olen ka ashi.

Cease Fire monitoring and supervision ketdangsürtemi tensa tiptemtsü aser tekaratiba nung yimten latettsü imlar ta BAN-isa ashi.

DMC-i syndicates aser monopolies noktangtsü meranger

Dimapur, October 14, 2024 (TYO): Dimapur Municipal Council (DMC)-i syndicates aser monopolies ajungketer ta aitsüba tiyazü ta metetdaksüogo.

Tesüiba hopta ishika shishilembaba dak sendakba teloktemi DMC dak tai tonglojka arur saka Deobarnü DMC-i "multiple taxations" ken o kecha mali ta metetdaksü.

"DMC aser ULBs ajak Nagaland Municipal Act, 2023 aser state sorkari latettsüba inyakyim ama ketdang asür. ULBs-i syndicates aser monopolies yarir ta asüba ya bilemloka aoba dang lir. Tesüiba küm 20 tsüingda asenoki syndicates aser ozüing memelaba teloktem adokba nguogo aser DMC-i iba tebilemstsü koktettsü atema inyaker" ta DMC-i ashi.

DMC-i permits aser licences kanga junga repranger aser

asadangba sülen ang agütsür. Iba ya of ULBs aser public taginüba nung ajemdaker inyaker. ULBs indang mapa ulura aser iba nung community services aser infrastructure anepalutsü dena lir ta DMC-isa metetdaksü.

DMC-i tashiyim agi sen mesarur mesüra lateta aliba den teimba memeshir. Ibala inyakyim kar lira DMC Office nem sangokjang aser onoki mapang shitak nung mapa inyaksü ta parnokisa ashi.

DMC-i national, international mesüra state highways nung collection gates lapoka mali aser GST items nung taxes mesüra fees magir. NMA, 2023 nung Section 124 nung lateta aliba ama dang tax meshir. Iba ya tajangzük angutsü atema masü saka sen sarutetba ajak public service nung amshir, ta parnokisa metetdaksü. ULBs dak legislative aser

executive powers lir anungji tanga telok kar dang asüingdangyaba sülen ang mapa inyaksü makok. Ajisüaka tebilembatem ashitsü ajungshir aser pelashishia agizüktsü. Osangkakettem nung mezüing meprokshii office nung arua tebilemstsütem lemsatet tajungba asütsü ta DMC-isa ashi.

Tesüiba küm 20 tashi mali arur DMC aser tanga ULBs tentetogo aser onoki akokba tashi loktiliba tenzüktsü meranger. Ajisüaka inyakyim kar sülen anidaksüsa akümer aser Dimapur tajungba kümdaktsütsüba ya anogo ka mapa masü. Asenok külem nükjidong atongtsü atema public-i temulung alemtsüba aser angatettsüba kanga nungdak anungji public-i olulu nung ajemdaker mashishitsü mepishir, ta DMC-isa metetdaksüogo.

Union Minister Jual Oram-i Nagaland semdang



Dimapur, October 14, 2024 (TYO): Bharatiya Janata Party Nagaland State-i October 13, 2024 nü Dimapur Airport nung Union Minister for Tribal Affairs Jual Oram pelashishia agizükogo.

Union Minister Jual Oram-i

anogo asemnü atema Nagaland semdangi aruogo aser pai tesem aika semdangtsü aser October 14, 2024 nü Zunheboto nung ketdangsürtem den senden ka amentsü.

October 15, 2024 nü DC Conference Hall, Dimapur nung

Union Minister Oram-i 'State Level Review Meeting' ka nung ayonga amentsü aser iba sülen media nisungtem den ajurutepba sülen Delhi-i meyipa aotsü ta Media Officer & Convenor, State Media Cell-i sangdong ka nung ashi.

Nagaland Angh-i Diksha Diwas nung shilem agi



Nagaland Angh Diksha Diwas sentong nung adenba noksa nung angur.

Dimapur, Mongputeni/Oct. 13 (TYO): Nagaland Angh La Ganesan-i October 13, 2024 nü Mahavir Bhavan, Dimapur nung 24th Diksha Mahotsav of Acharya Pramukh Sagarji Maharaj sentong nung dena liasü.

Pai iba sentong nung jembidang 108 Acharya Shree Pramukh Sagarji Maharaj den külemi sapang ka nung shilem agitsü maongka anguba atema pela bilemer ta ashi, shiba arishi küm 21 asüdüng alima konang tetushi yutsü aser Nagaland nung shishilempaba tesepe, Dimapur nung 24th Diksha Diwas külemi amungba ya kodanga mamashitsü, ta ashi, shiba tetsüing tesa agi linük nung yimti aika sema jaja liasü.

"Mezüngbuba Lord Rishabh Nath nungi 24th Lord Mahavira tashi Jain nung tem

yagi takum aliba ajak akumtsübo a azüdükshiba nungi pila alir, ochi nung nokdaker, yimya tamajung mamshir aser yimjung nung alir," ta pai ashi.

Jain nung ter tesayuba ya tamangba yimsü nung külemkejaba kisüing masü India nung sobaliba aser shisatsü nunga tera yanga lir. Parnoki azüdükshi malitsü sayuba ajanga Mahatma Gandhi ama tejangja lenir aika ajungmeso, ta Angh-i ashi.

Item tanüla nung lenirtemi temeim aser arok asoshi bilema inyaksü sayuba ya tanüa tapet lir, aser takum aliba aser libajen nem timtem agütsüba ajemdakja takum yimyatem amshir, ta ashi.

Dimapur nung aliba Jain nung nem tenüngsang agüja jembidang, tesüiba küm 140 shi Nagaland nung parnoki lokti

aser rongsenketzüng terenlok nung shilem tulu agia arur, ta Nagaland Angh-i ashi.

Jain school, tetsür indang college, charitable hospital amala amenoka nüburtem lenla balala nung yarir, blood donation camps, medical camps ayongzüka, prosthetic limbs, chiyongtsü angati agütsüba, angati shisaliok agütsüba nung Jain nung kija aser lokti ajanga shilem tulu agia arur, ta ashi.

Alima ajunga nung COVID-19 tashidak jatteta aliba mapang Jain nung temi community quarantine center mezüngbuba lapok aser nisung lakh ka dak tema nem vaccine agütsü, ta pai ashi.

Angh-i Jain monks aser nüburtem dang yimjung asoshi tasü ita nokdaksü ayongzüka aser Diksha Diwan salem lemsatepa liasü.

Ungma nung capacity building seminar ayongzüka



Soyim Gazetted Officers' Association (SGOA) ajanga Mount Moriah School Auditorium, Ungma village nung October 12, 2024 nü lokti tentet balala nungi lenirtem asoshi seminar ka ayongzüka nung adenertem noksa nung angur.

Dimapur, Mongputeni/Oct. 13 (TYO): Soyim Gazetted Officers' Association (SGOA) ajanga Mount Moriah School Auditorium, Ungma village nung leadership capacity building seminar ka October 12, 2024 nü yimtsüing nung reju aser lokti tentet balala nungi lenirtem asoshi ayongzüka liasü.

Iba seminar nung shisalen sayur Limatemsu, Senior Treasury Officer, Kohima ajanga 'Financial Record Keeping & Personal Financial Management' onük nung jembidang aser Dr. Limasena Jamir, Asst. Prof. Fazl Ali College, Mokokchung ajanga RTI & Official communications onük nung jembidang liasü.

Limatemsu ajanga accounting indang kongsang balala, accounting nükjidong, tajangzüka aliba aser accounting indang tamendak dak aser tangatetba lemsatepa liasü.

Paisa pei jurila senotsü

ketdangsuba indang onük nunga jembidang investments, loans amala nung senotsü ketdangsuba aser 'depreciation accounts' indang tejangja ashi. Limatemsu-isa investments atema mapang shidak shimba aser loan agiba nung tajangzüka aliba indang shisatsü lemsatepa liasü.

Dr. Limasena Jamir ajanga RTI indang angatetdaksü aser amshiyim indang rasaa ashi.

Official communications indang jembidang, shiti, emails, website portals, telephonic communications, press releases, legal notices, senden amenba aser yangji lemtetba, reports amala ajanga osangtsüsang prokshiba indang lai ashi.

R. Longritemjen Ao, Rtd. Asst. Labour Commissioner ajanga iba seminar ayongzüka nükjidong lemsatepdang lokti tentet aser reju balala tajungba nung inyaksangshitsü atema iba amala seminar ya nüngdaker, ta

ashi. Kechiserna metetba aser angatetba nung tetsüingta lir, aser asenoki angateta inyakdang asenok lenir tajung akumer, ta pai ashi.

Iba seminar yagi tanü lenirtem nung onük nung aliba ama shisatsü agütsütsü, ta pai ashi.

Iba seminar nung Ungma village council, Ungma Baptist Church, Ungma Senso Mungdang, UBA Youth Ministry, Sports Society Soyim, Soyim Students' Union, Teachers' Association Ungma, Ungmatsür Telongjem aser SGOA nungi ketdangsurtem aser züngsemtem dena liasü.

SGOA tir, Dr Rongsensusang, Asst Chief Technical Officer, KVK ajanga sentong tenzüka tayongzüka o jembidang aser Asasoba Jamir, SDO, PWD (NH), Asst. gen. Secy., SGOA ajanga melepzüing o jembidang liasü.

Assam Rifles-i National Integration Tour nung shilem agirtem agizük

Dimapur, Mongputeni/Oct. 13 (TYO): Linük lungjemdaksütsü tangatetba shisatsü adokdaksütsü, lanurtem tekolok-shisatsü ulushitsü aser Nagaland meta tezülen aliba tanurtem alima ainba metetdaksütsü nükjidong nung Meluri nung aliba Government Middle School aser Government Higher Secondary School nungi kaketshir 20 aser tesayur pezü anogo 15 atema National Integration Tour aoba October 13, 2024 nü Assam Rifles temi Kohima nung agizüka liasü.

Iba tour nung shilem ka ama kaketshir temi Bangalore, Belgaum aser Delhi semdanga liasü.

Mezüngbuba nung kaketshir temi Bengaluru semdang aser iba mapang parnoki National Military Memorial, Bangalore Palace, National Gallery of Modern Art, Jawaharlal Nehru Planetarium, Lal Bagh Botanical Garden, aser Tipu Sultan's Summer Palace semdanga liasü.

Iba mapang parnoki Army Service Corps Center

semdanga kaketshir temi India indang tarutsü sepaitem training agiba yima ngua liasü.

Shilem tanabuba nung parnoki Belgaum semdang, kong parnoki Commando School, Belgaum nung Indian Army commando training agiba tsüngtong oa repranga liasü.

Parnoki iba mapang Maratha Light Infantry Training Center semdang aser Belgaum leg nung shilem ka ama Gokak Waterfalls, Hidkal Dam aser Belgaum Fort semdanga liasü.

Tatamsa parnoki New Delhi nung India Gate aser National War Memorial amala tongtipang aser otsü aketba tesemtem semdanga tangazükba jenti ngua liasü.

Iba mapang parnoki Delhi Metro nung jajadanga linük indang technology terenlok ajangshia liasü.

Kaketshirtem ya October 13, 2024 nü Kohima tonga aru, kong Flag-in Ceremony sentong ka ayongzüka liasü. Iba sentong tongti tesemdang ya Major General Manish Kumar, SM, Inspector General Assam Rifles (North) liasü.

Sepaitemi Mon nung nisung asem den hadir apu

Dimapur, Mongputeni/Oct. 13 (TYO): Mon jila nung telungpur senzüsempongba osang itdangiter nungi tejangja aruba nung ajemdaker Assam Rifles aser Nagaland Police lungjemer October 12, 2024 nü mobile vehicle check post ka amenoka liasü.

Parnoki gari tem meita aoba mapang Alto gari ka nungi NSCN (KYA) züngsem ka den nisung ana apu aser parnok ket nungi 7.65mm pistol ka, injang aser tashiyim amshia senotsü saruba slips aser documents tem nguteta liasü.



Iba sülen parnoki apur nisungtem aser osettsüset ya Nagaland Police nem agütsüo.

Sainik School Punglwa nung NCC CATC tenzüko



Dimapur, Mongputeni/Oct. 13 (TYO): Sainik School Punglwa nung Combined Annual Training (CATC-72) sentong October 11, 2024 nü tenzüko.

Iba training nung St. Joseph College Jakhama, Tetso College Dimapur, Dimapur Government College, Peren Government College aser Modern College Piphema nungi cadets 177 shilem agitar. Camp ya Officer

Commanding Lt Col Amit Chaudhary-i tenzüksü aser cadets tem den jembidang teamwork alitsü, yimya tajung amshitsü aser lenir sempet aser yimya amshitsü tongtipang lir ta ashi.

Iba camp ya October 20, 2024 tashi alitsü aser iba mapang NCC curriculum nung aliba ama drill, firing, map reading, camp setting, first aid aser ano saisapong aser sobaliba sentong amala ayongzüksü.

Delhi nung Police-i Sonam Wangchuk den külemi nisung 20 apu



October 13, 2024 nü Ladakh Bhavan, New Delhi nung climate activist, Sonam Wangchuk-i India temzüng Sixth Schedule nung Ladakh züngoktsü atema mener takhangba agütsüba mapang nung police kari pa den jembidang tangokba noksa nung angur.

New Delhi, Mongputeni/October 13 (Agencies): Amongnü Delhi police-i climate activist, Sonam Wangchuk aser pa den külemi longkak aitba nung shilem agir nisung 20 apu; Ladakh Bhawan kima longkak aitba atema police-i parnok apu.

Wangchuk den külemi nisung 20-25-i mener longkak aitba mapang nung police-i parnok pua Mandir Marg police station-i anir ao.

Tensa azüoktsü atema iba tesem nungji police aika yoka lir. Longkak aiter karibo police dang, parnok longkak aiter masü saka tesünep nung mena kazür dang, ta ashi.

Ajisüaka police ketdangser kati, Ladakh Bhawan kima

amentsü atema parnok nem temelaba magütsü, ta metetdaksü.

“Parnoki Jantar Mantar nung longkak aittsü atema temepishiba agüja lir aser tang tashi nungbo temepishibaji magizük. Tanga tesem kecha nunga longkak aittsü atema parnok nem temelaba magütsü. Onoki nisung kar puogo, saka kobi melii chioktsü,” ta pai metetdaksü.

India temzüng kübok Sixth Schedule nung Ladakh züngoktsüla, ta takhangba agüja Wangchuk den pa pusemertemi Delhi nungi Leh tashi longkak aita jaja.

September 30 nüa parnok Delhi arrtsülen Singhu arrtsü nung Delhi police-i pua liasü

saka October 2 aonung chiok. Wangchuk-i aniba telok jagi Ato kilonser, Narendra Modi densema tongti ketdangsertem ajurutsü atema takhangba agütsür.

Linük temzüng kübok sixth schedule ajanga Assam, Meghalaya, Tripura aser Mizoram state tem nung tribal tesemtem nung administration agütsür. Item tesem nung yimsüsütsü atema legislative, judicial, executive aser financial tashi agütsür.

Longkak aiterter jagisa state jenjang, Ladakh atema public service commission ka aser Leh o Kargil districts atema temeja Lok Sabha menden lemezükjang, ta akhanger.

Mumbai nung NCP lenir, Baba Siddique khaset

Mumbai, October 13 (Agencies): Honibar nikongdang Mumbai kübok Bandra nung mejangjaba nisung kari Ajit Pawar-i aniba Nationalist Congress Party (NCP) nung lenir, Baba Siddique dak injang khaloktsüba sülen pa Lilavati Hospital-i anir ao, saka mekümzükteti süogo; pa arrshi küm 66 liasü.

Par jabaso aser Bandra East nungi MLA, Zeeshan indang office anasa nisung kari pa dak tebok aser teku nung injang khalokja liasü.

Iba tatalokba dak sendakba

nung police-i nisung ana apuba sülen asüngdangyadar aser nisung kabo jenshia senzüdar, saka pa maitsüjia jangjaogo, ta police-i metetdaksü.

Nationalist Congress Party (SP) lenir aser taoba mapang Maharashtra home minister, Anil Deshmukh-i, Maharashtra nung tzüzüng-ozüng tensa raksaogo; Siddique nem Y-category security agüja liaka pa khasetba ajanga süngmanger, ta metetdaksü.

1999 küm nungi 2009 küm tashi Siddique ya Bandra West nungi asemben tashi MLA

inyakogo. Pa küm 48 tashi Congress Party den liasü aser taküm February ita nung ang pai Ajit Pawar-i aniba NCP nung aden. Par jabaso, Zeeshan Siddique-a August ita nung Congress nungi jendoka liasü.

Osang ka ajanga ashiba agi, Siddique dak injang trok khaloktsüba nungi injang pezüi pa dak khashia liasü. Police-i pua aliba nisung anati parnok Lawrence Bishnoi telok nung züngsem lir ta nangzükogo.

Joko kobi melii Maharashtra nung election agitsü lia NCP lenir khaseter.



October 13, 2024 nü Jalandhar nung aluyimertemi gari lenmang mokdang longkak aitdang tangokba noksa nung angur.

MVA teloktepi CM candidate sangdongtsü: Uddhav Thackeray

Mumbai, October 13 (Agencies): Küm tatembanglen Maharashtra nung Assembly elections agitsü lia state nung yimtenren party tem tsüngda aitsütepdar.

Amongnü Shiv Sena (UBT) lenir, Uddhav Thackeray-i, ruling Mahayuti teloktepi Chief Minister candidate tenüng sangdongba sülen Maha Vikas Aghadi (MVA)-ia Chief Minister menden atema tenüng sangdongtsü, ta metetdaksü.

MVA-i Maharashtra nung Mahayuti teloktepi sorkar aija, state nung tzüzüng-ozüng tensa majung, ochimashi lir aser parnok nangzükbatem meinyaker, ta aitsü.

Mahayuti teloktepi nung BJP, NCP aser Shiv Sena (Eknath Shinde teloktem) densema lir aser MVA teloktepi

nung Congress, Shiv Sena-UBT (Uddhav Thackeray telok) aser NCP-SP (Sharad Pawar telok) densema lir.

Mumbai nung osangbenertem senden ka nung jembidang Uddhav Thackeray-i, BJP aser Eknath Shinde-i aniba Shiv Sena telok aija, state nung BJP tensa kanga mejungi lir aser kechiyong parnoki auer aser ashioktsürtem lenisüba nung election nung tokteptsüsa akümtsü, ta ashi.

“Mahayuti nem tama Chief Minister candidate tenüng sangdongdakjang, iba sülen onokia CM candidate tenüng nenok nem metetdaksütsü. Tang Mahayuti sorkar lir, anungji parnoki tama CM candidate tenüng sangdongtsüla,” ta paisa metetdaksü.



October 13, 2024 nü Jammu & Kashmir kübok Doda District nung AAP National Convener, Arvind Kejriwal-i lokti senden ka nung jembidang tangokba noksa nung angur.

Tir Droupadi Murmu-i linük asem semdangtsü atema apusoa ogo

New Delhi, October 13 (Agencies): Linük Tir, Droupadi Murmu-i Africa kübok aliba linük asem semdangtsü atema Amongnü Delhi nungi apusoa ogo.

October 13 nungi October 19 tashi nung Murmu-i Africa kübok aliba linük asem- Algeria, Mauritania aser Malawi semdangtsü, ta Ministry of External Affairs-i metetdaksü.

Amongnü Rashtrapati Bhavan-i X ajanga, “Tir Droupadi Murmu-i Algeria, Mauritania aser Malawi semdangtsü atema apusoa ogo. Tang mezüng India nung tekolak kati item linüktem semdangtsü,” ta metetdaksü.

Murmu-i Algeria, Mauritania aser Malawi nung lenirtem den senden amentsü aser item linük nung alir India nungertema ajurua jembitsü.

Ministry of External Affairs nung otongdar, Randhir Jaiswalia X ajanga, “India-Africa tesendaktep tashi taitba akümer. Tir Droupadi Murmu-i Algeria, Mauritania aser Malawi linüktem semdangtsü atema tayimtsü nung apusoa ogo,” ta metetdaksü.

October 13 nü la Algeria tonga ogo. Lai Algeria Tir Abdelmadjid Tebboune ajurutsü. Kasa anogo nung lai

yangji aliba India nungertem ajurutsü.

October 14 nü lai Maqam Echahid monument semdanga Algerian War of Independence nung taküm bendanga agütsürtem nem akhüm agütsütsü. Iba sülen lai Algeria-India Economic Forum aser Sidi Abdellah Science & Technology Pole University na nung o jembitsü.

Laisa Jardin d’essai nung Indian Corner semzüktsütsü aser Hamma Botanical Garden nung India Centre semzükja India nungi bener aoba süngdong ka temtsütsü.

October 16 nü la Mauritania tonga aotsü aser Mauritania Tir Mohamed Ould Cheikh El Ghazouani ajurutsü. Iba sülen tenati sobaliba, foreign office institutions, foreign office consultation aser visa waiver indang tezüngzüktepi pezü agitsü.

October 17 nü la Malawi tonga aotsü aser Tir den senden amentsü. Lai business sentong ka nung o jembitsü aser yangji aliba India nungertem ajurutsü. Iba linük nungi youth affairs, sports aser cultural exchange dak sendakba tezüngzüktepi asem agitsü.

Tesüsa October 19 nü la India-i meyipa arutsü.



TIR YIMYIM YIMOBILEM (EDITORIAL)

DIMAPUR TENTONÜ, OCTOBER (MONGPUTENI) 14, 2024

Memerük memeshiba tenla

Tawa Diphupar Ao Baptist Arogo nung Nagaland Baptist Church Council meyong Nagaland Development Outreach tenzüker küm 25 ajungba sentong nung jembidang, Eleutheros Christian Society (ECS) nung lenir Rev.Dr.Chingmak Chang-i jembidang, arogotemi shiba aser koba nungi südirsüaka memeshi aser memerükba tenla senbo magizüktsü ta lemtet nungbo asenok ochimashiba tensa tia ya tajungba kümla ta ashiba tajungshi o ji asenok ajaki süoki ia bilemdangtsüba nungdak o ka lir. Asenoki junga amangtetaka-mamangtetaka, Nagaland nung Naga nungerbo ajak Khristan lir, anungji ajak asoshi arogo ya tashi, taneptsü aser teimla angudak arok lokti ka lir. Atangji, arogo ta asüba ya pastor dang ashir masü mesüra deacon-tem dang ashir-a masü, kechiyong arogoji parnok kisung masü saka Yisu Khrista-ji pei taküm nung kibur aser kümtedakba ta amanga tamanger telongjem tentetba rogotem rongnung zungsemertem ajakji arogo nunger lir, anungji parnokji arogo. Ajisüaka, arogo ta asüandang jet ta asenoki pastor mesüra deacon dak rangloker saka asenoki asenok dak rangloktsüla, kechiyong asenokji arogo lir. Atangji, lokti asünungji lenir lir. Aji oda, kibong ta asüandang jet ta tebu aser tetsü dak ranglokba ama arogo nungjia arogo nunger lenitsü atema lenirtem shima lir, anungji arogo dak imlaba aser arogo nem inyaktaktsünüba ashibajibo, atangji, parnok dang ashir ta parnokia parnoksa angaloktsüla. Ajisüaka, arogo nung lenirtemi arogoi inyaktüba mapa ajakji arogo nung nütsüngtemi inyaktüla ta bilema, mapa dang lemtsür, paa aser laa pei mapai ora, iba arogojibo, atangji kibur maliba lu aser tanükertem maliba santem amai dang kümadoktsü. Ibayongji arogo teinyaktütem sentong yangluba aser arogo nungdak asoshi sen aruba aser endokba mapatemjibo arogo nung lenirtemi atonga inyaktü. Iba jagi Tsüngrem tenzükertem ta asütsü melen asenokibo arogo tenzükertem ta ajar, kechiyong parnokji Tsüngremer arogo tenzükertem lir. Arogo nung tenzükertem o nütsüng na tepilaji yangji angateter. Aji oda, arogo asoshi senotsü nungdakba koma bushitsüla aser koma endoktsüla ta asüba sentong yangludang, arogo asoshi senotsü arulenji ka dang lir, aji tamangertem nungi tenla tapu balala Tsüngrem nem agütsüba nungi angutsü. Atangji, tenla ya Tsüngrem nem tekatsütepa agütsütsü makoker, anungji arogo ajanga dang Tsüngrem nem agütsür. Ibaji kodang angatetdir, tenla sen ya tetsübutüka akümer, anungji tagütsürtemia kanga kümdanga agütsütsüla aser tagizüker aser tamshirtemia tekümdangba agizüka amshitsüla. Aji oda, Tenyartem mapangbo Tsüngrem nem agütsüba tenla agizüka amshirtem masü saka tagütsürtemang tasü lendong ajuruba otsü asenoki azünger. Ibaji kodang bilemdangdir, Tsüngrem nem agütsüba tenla nung ya temoatsü dang masü saka meindangra, tagütsürtemang lendong tuluba aser tagizüktemang lendong tuluba ta keta lir ta angatetsü. Ibayongji, tagütsürtemia memeshi memerükba tenlabo Tsüngrem nem magütsütsüla aser tagizükertemiang magizüktsüla ta ajungshitepner. Atangji, tagütsürtemibo metettsü saka tagizükertemi kodaser tenla arubaji memeshi aser memerükba tenlaa ta metettsü ? Ibaji arogo nung lenirtemi mebendangtetsü. Ajisüaka, arogo nung akok tashi amangba purtem dang memerükba aser memeshiba tenla senbo bener marutsü tangatetba agütsüra, iba jagia nübortem tangatetba dangi anitsü. Ashiko, karibo meshiteter amshiang ta ser memeshi memerükba tenla agütsütsüa akok, ajisüaka kodaser metetsümonga Tsüngrem nem memeshiba aser memerükba tenla agütsütsü ? Ashiko, asenokibo ajia agizüktsüa akok, kechiyong asenok tamang aser tangatetba yagibo memeshi memerükba tenla magizüker masü bushia aoer. Ibaji kodang bilemdangdir, asenok arogotembo memeshi memerükba tenla magizüktsü ta masü saka memeshi memerükba tenla bushia mejajatsü ta tama telemtetba agitsü nungdaker. Iba tamang aser tangatetba seret nung ya asenoksasa asenok khen odangtsü kanga nungdaka kümogo.

OLEMSABANG

ALUYIMER ASOSHI METSU MOL (FERTILIZERS) AMSHIYIM NUNG SHISA LUYIM

*Courtesy: Division of Soil Conservation,
Krishi Vigyan Kendra Mokokchung*

Alu yimba nung tsünüsempongtsü junga adoktsü atema ali temo shitak ali mali metettsüla tim. Ali nung ya mesen tapu aika lir-tajunga lir tamajunga lir, ano maneni tsünüsempongtsü junga adoktsü atema mol ter trok (16) kangasa tongtipang lir. Itemji Carbon, Hydrogen, Oxygen- item asem ya tzü mopung nungi angur. Maneni Nitrogen, Phosphorus, Potassium ya major (tongtipangtiba) mol ta ajar kechiyong parnok ya aika nungdaker. Calcium, Magnesium aser Sulphur ya Secondary mol ta ajar. Mol koba tera dang nungdaker saka mali nungbo aluyimer alu nungi tarutsü tim mengutetter/ merüteter item mol tangji micro mol ajar, Zinc, Boron, Iron, Copper, Manganese, Molybdenum aser Chlorine ya iba telok nung aiter.

Item mol ajak ya ali nungi dangpo peria mangur anungji metsü mol- fertilizers aser micro nutrients ta English oshi nung ajaba (koba nung mol telemsa aika temalen shia alibatem angutsu akok) item ji amshia tsünüsempongtsü tajungtiba nung züsentettsü koka lir. Asenoki mol amshi yim- koba amshitsüla, koma amshitsüla, kwika amshitsüla aser kodang amshitsüla ibaji kangasa tongtipang aser ibai metteta mol tapu balala tem ya amshi nungbo kanga tajung asutsü aser tajangzük angutsü.

Alu ali tendangtsüba ya kanga tongtipang lir. Asen lima nunga District Soil Conservation aser Krishi Vigyan Kendra ajanga ali tendangtsu koka lir. Parnok office nung Soil Testing Laboratory lapoka lir koba ajanga alu yimer nem tajungtiba nung tendanger Soil Health Card agutsür. Iba Soil Health Card ya kanga tongtipang lir kechiyong iba card nung ne ali nung mol koba nungtaker iba resultji angutsü, aser iba result dak ajemtaker nai metsü mol tem enoktsüla. Peria aliba ji meinoktsü, ajema aliba nungbo enoktsüla. Iba den sendaktepba nung maneni experts tem den tongtepratepsüla.

Ano aonsotsü aser süngjang tedong balala ama, mol tenungdakba temji ajak asoshi balala lir. Anungji asen alu ali nung mol nungdakbatem metteter külen amshitsüla. Kechiyong item metsü mol/ fertilizers ya amshi yim memeteti amshira mesura kija amshira ali takang kumdaktsür, tzü mopung menetsür aser ken atema dang sür bo ali nung aliba mol ano tajemba kumdaktsür aser ali tasen (acid) kumdaktsür.

Asen tendak anguba metsü mol (fertilizers) kar lir aser tongmelang agi yamai rasar:

1. Urea- Iba mol ya tereprangtsü nung temesüng aser tachiba metsü mesüker. Urea ajanga tsünüsempongtsü nung Nitrogen agütsür, aser urea kg ka nung Nitrogen ji 46% alir. Iba urea mol nung Nitrogen aliba ajanga tsünüsempongtsü aser süngjang tedongtem atema tu nung teyari tulu agütsür. Tu ya kanga tontipang telen ka lir koba nung asen sürojokdak amai tsünüsempongtsü aser tanga süngdong nunga anü tashi agia, mopung aser tzü nungi, ano ali nungi tedong ka nungdakba mol tem amshia teyari tulu ngua ainer. Urea tenungdakba dak tali amshi yim nung ali tasen, temerang aser takang akumtsü.
2. Di-Ammonium Phosphate (DAP)- Iba mol ya tereprangtsü nung tenakrem aser telong long angur. DAP ya Phosphorus agütsütsü asoshi amshir. DAP kg ka nung Phosphorus 46% aser Nitrogen 18% ta alir. DAP amshiba ajanga tera nung tashi itdaktsür aser naro apüngba aser süngjang atangba nunga yarir aser tsünüsempongtsü tajungtiba nung endaktsür. DAP nung Nitrogen aser Phosphorus, anaprongla aliba ajanga, kodang ya amshidir, Urea ya ajema amshitsüla.

(Maneni asüng adok nung..)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ABAM Youth Ministry 6buba Triennial Conference mongogo



Impur, Mongputeni/October 13 (TYO): ABAM Youth Ministry 6 Buba Triennial Conference October 9-11, 2024 anogotem nung Impur nung "Tera Yangang" (Kolosi 2:6-7) omen nung ajemdaker kanga takok ngua agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Ajak agi Arogo 171 aser Fellowship 13 nungi Associate Pastor Youth temi anir lanur 1,742 arua iba sentong tulu nung aden.

Rev. Dr. Prof. Mar Pongener, Executive Secretary ABAM, Rev. Tali Jungla Longkümer, Associate Pastor Women, Ungma Baptist Arogo aser Mr. Toshi Sanglir Secretary, ABAM YM ajanga omen nung ajemdaker tekülem sentong nung lanurtem ajak

kanga temoatsü ngua jembia liasü.

Sentong nung tongti shilem kaji "Bible Bee" competition liasü. Ajak agi lanurtem 53-i arua shilem agiba nung Ms. Chubanaro, Chuchuyimlang Baptist Arogo ajanga mezüngbuba jenjang angu, Ms. Benjungsena, Mangkolemba aser Ms. Akumtula, Changtongya Town BA ajanga tanabuba aser tasembuba jenjang angu.

Sensaksem sentong agia liasü aser iba mapang nung "Building a narrative of rootedness: Faith on the periphery" aser "Aor tia: Tang aser Tarutsü" onük nung Mr. Lanutemsü Yaden, Vice Principal of Mt. Carmel School, New Delhi aser Dr. Lanurenla, Principal, Sao Chang College, Tuensang nati jembia liasü.

Lanutem taküm nung takok ngua pei sasa inyaka litettsü nükla tulu nung taküm nung takok angurtem nübo ter jaoka takok anguba kuli agütsüdakja liasü.

Dr. Limasenla Jamir, Asso. Professor, Fazl Ali College, Mokochung ajanga iba session nung onir süa parnok pei takok kuli agütsüba nung anebalu liasü. Iba sentong ajanga lanurtem aika temoatsü ngua tangazükba tulu nguogo. Parnok tenüng yamai; Temsü Clover, Imkongnükla, Imkongangba, Chubalemla Kichu, Dr. Akümtoshi, Temjen Jamir, Er. Along, Imkongchuba, Imolangba aser Akala Ayim nung liasü.

Maneni Youth Ministry ajanga lanurtem ajak dangi Tsüngrem osang bener aodang Tsüngemer leniba agüja takok angutsü sarasademer.

ANO GO ABEN TSÜNGREM DEN

Taküm Tsüngkümtem

"Kechisarena asoshi Tsüngküm ka lir, aser anüing kübok mapa ajak asoshi mapang atakteta lir"

Sayu 3:1.

Tsüngremi tsüngküm pezü balala yanglu, saka taküm indaktsütsü asoshi item tsüngküm pezü külemi mapa inyaker. Metsü tsüngkümji taküm tasen adokba. Miya mapang ina tejang atangba mapang. Mankonang mapangji aluruba mapang lir. Mapa inyakerem pei mapa nung taa anguba mapang. Tsüngküm mapangji tashi meiti akümba mapang lir. Taküm tebur tajung mapang süitemba mapang. Item tsüngküm melentepa aruba jagi taküm nung tongtipang lesson agütsür.

Tsüngremi yimya nung tsüngkümtem sentong yangluba ama taküm nunga tsüngkümtem yanglur. Taküm nunga metsü mapang lir. Kodang asenoki mapa tasen ka tenzükdir iba nungi tajangzük angutsü imlaa atar. Miya mapang nung asenoki timtem arema asen nem nungloktsüba mapa meranga inyaker. Mangkonang mapang asenoki meranga inyakba nungi süngjang aonger. Tsüngküm arur, taküm mapa tatembang kati arur. Kenken tsüngküm mapang nung timtem bener arutsür, saka metsü mapang nung timtem ajak süitema aotsü asenoki imlaa atar.

Tsüngremi asenok taküm asoshi tabensa sentong yanglutsür, mapa inyakba mapang aser iba nungi tajangzük agiba mapang Pai renemtsü. Süngjema alitsü aser anisüngzükba alitsü mapang Pai renemtsü. Anogo shia kasa mapaji tamang katetta inyaka alitsü. Kenü Pai asen mapa züngdangner. Saka ano jangratemtsü aser tasen tenzüksü mapanga Pai renemtsü. Tsüngrem taochi ajanga asenoki metanga inyakba mapa nung aluruba mapang alitsü. Tsüngrem taochi ajanga asenoki timtem aser tejashi temekong tsüngküm nunga tenzüksü, kechiaser tsüngküm melii metsü mapang alitsü makok. Yimya nung tsüngkümtem amaji taküm nunga Tsüngremi mulungba abensaa inyaksü taküm tsüngkümtem lir.

China aser Iran-i Khristantem reshikangshitsü atema AI amshir

October 13, 2024: China aser Iran nung ketdangsertemi Khristantem maitsü jangjaa reshikangshitsü atema facial recognition technology ama artificial intelligence (AI) tools amshir, ta U.S. Commission on International Religious Freedom (USCIRF) Chair, Stephen Schneck-i metetdaksü.

"Iran aser China ama linüktemi amshiba item technologies tasen ajanga alima tesem balala nung yimsü azüoktsü atema lenmang lapoktsür. Iba ya tebilemstü onük tuluka lir aser ibaji onoki tenük yoka repringdar," ta taoba mapang Catholic University of America nung Dean aser professor, Stephen Schneck-i metetdaksü.

"China nung facial recognition techniques ajanga Chinese Communist Party (CCP)-i yimsü dak sendakba sentongtem nung adenertem tenük yoka repringer. Item technologies amshia yimsü amangertem maitsü jangjaa parnok anema inyaker. Tesüba mapangtem nungbo item ama

technologies ya parnok ket nung maliasü. Item ama technologies ya alima tesem ajaklen angur," ta paisa metetdaksü.

"Alima nung tarutsü mapang atema ni tsüba bilemstür. Anungji itemji anema alima nung yimsü balalai tang mera agia inyaksü nungdaker," ta pai metetdaksü.

Berlin yimti nung International Ministerial Conference on Freedom of Religion or Belief senden amentsü jakdang pai item o ya jembia liasü.

Küm shia ayongzükba agiba conference ya yimti balala nung ayongzükba agir aser taküm iba conference nung alima nung sorkar balalai yimsü balala amangertem, talisa Khristantem anema AI amshiba tebilemstü atema jembio.

"Iba ya tebilemstü onük tuluka lir, ibayongji commission-i iba tensa mita dang repringdar. Alima tesem balala nung kuli balala ajanga yimsü nung ajemdaker reshikangshiba kanga bulua

kümdar, aser ibaji talisa sorkar ketdangsertemi tashi alia amshiba aser democracy jenjang tamajungba akümba agi lir," ta pai ashi.

"Atangjiji, tashi tali amshiba sorkartemi linük aser party tangatbatem dak alaka par sensotem nem temeden aser ochi memetdaksünüba agi lir. Anungji sorkartem atema yimsü ya tayongzükba ka lir," ta pai metetdaksü.

Alima nung reshikangshiba kanga bulua akümba mapang ka nung International Ministerial Conference on Freedom of Religion or Belief senden ya akar.

Khristan melungtet telok Open Doors-i ashiba agi, tang alima nung reshikangshi ajangshiba Khristan million 365 shi lir. 2023 küm alima nung Khristan tenet shia nungi katibosa reshikangshi ajangshio.

Hudson Institute nung Quantum Alliance Initiative director, Arthur Herman-i, China nung ketdangsertemi tashi alia amshiba aser AI amshiba ya anüolen aliba

linüktem sobaliba sendoktsü aser Chinese Communist Party indang tangatbatem benoktsü atema lir.

Paisa, China-i surveillance technologies amshia Uyghurs ama teloktem anema inyaker, concentration camps nung ayur, mapa tasak inyakdaksür aser reshikangshir.

2027 küm tashi nungbo China-i AI nung sen indokbaji alima nung AI atema senotsü indokba shilem asemstü nungi shilem ka asütsü. 2030 küm tashi nungbo alima nung AI superpower linükji China asütsü nükjidong nung inyaker.

Paisa, "United States-i China nung AI anema inyaksü asoshi asalentong yangluba dang masü saka AI nung America nung temaba asütsü atema inyaksü nungdaker," ta ashi.

Arogo dak sendakba nung mongin, George Barna-i, AI ajanga Arogo nung mejungi kongshitsü ta ni tebilemstü akar, ta metetdaksü.

"Khrista dak temang ka ama 'artificial' ta asüba ajak nungji asenoki temelung

malemstüla aser kümdangstüla.

Iba ya asenok shisatsü, temang aser tanela health atema majung. Ni lenirtem dang kanga kümdanga alitsü mepishir, kechiyong ibaji (AI) ajanga asenok dak mejungi kongshiba dang masü saka tangar taküm nunga teraksatsüba bener arutsütsü," ta pai ashi.

Iba denji kasa tawa Southern Baptist Convention aser World Evangelical Alliance-ia AI ajanga meimchir maitsü aser shisatsü nung mejungi kongshiba tebilemstü lemsatepogo.

Yaküm Southern Baptist Convention Resolutions Committee-i "On Artificial Intelligence and Emerging Technologies," ta ser bangzüng ka renem aser ibaji ajaki agizükba liasü.

Iba bangzüngji ajanga loktiliba, industry aser sorkar lenirtem dang item technologies tajungba küma yanglutsü, AI dak sendakba temzüng yanglutsü aser item technologies kanga kümdanga amshitsü atema mepishia lir.

AO OSHI ANGAZÜKDAK:

Tanü dangtsü

(n) tejak reprangba aina (mirror)

* Akhi tsüraburtemibo tanü dangtsü mangu.

Tanük

(n) temerang masü, temenüngsa, tematazük (soft, fine stuff)

* Tanur nem chiyongtsü tanük agütsür.



OLONG PAITEP # 6951

	1			2		3		4
5						6		
7			8					
						9		
		10						
11								12
				13				
				14				
15								

TIPIEN

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latettsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayim dak - (4)
- 16. Ajok - (5)

LANGTSÜNGLEN

- 2. Hai sür inyak - (4)
- 3. Aor tenünga ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

OLONG PAITEP # 6950 TELANGZÜBA

TIPIEN :

- 1. Aben, 4. Artsü, 7. Lisem, 8. Liwa,
- 9. Sarasadem, 12. Aket,
- 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Sүjak, 10. Aonung,
- 11. Dokan, 13. Tinu.

NAI-A YA METETTER MA



October 12, 2024 nü Portugal nung University of Lisbon nung Guinness World Record ka yanglutetogo. Iba University nung IST school of technology ajanga "largest computer programming lesson in a single venue" otsü yanglutet. Iba sentong nung nisung 1,668- i shilem agi ta Guinness World Records Adjudicator Paulina Sapinska-i kuli agütsü.



Indian Army-i Manipur kübok Senapati district nung modern computer lab ka aser Skill Development Centre ka lapoktsüogo. Indian Army-i PK Shedu Revival Foundation Children's Home (Orphanage) nung computer lab aser Taphou Pudunamei village nung Skill Development Centre ka lapoktsü. Item mapa ya Operation Sadbhavana kübok inyak ta Army-i ashi.

Meitei telungpur teloki Oct 15 nü Manipur mokdangtsü

Imphal, October 13, 2024 (Agencies): Meitei nunger tali bilemloka aoba telok Alliance for Socialist Unity Kangleipak (ASUK)-i October 15 nü state ajungalen Black Day (Amamba Numit) ayongzükogo.

"1949 nung tashiyim agi Indian Union kübok Manipur chuba yimli dendaktsüba atema tejashi sayua state ajunga mokdangtsü" ta ASUK publicity committee convenor S Mangal-i ashi.

Iba mapa ajanga Manipur putiotsü melenshidaktsü aser litsü o yimsüsüba agien ta Mangal-i ashi.

"1947 küm British yimsüsüba nungi nüjiso anguba sülen

Manipur ya linük balaka liasü. India sorkari tashiyim agi October 15, 1949 nü state ka kümdaktsü aser iba ajanga Indian Union sasep nung Part-C State ama aküm" ta ASUK-i ashi.

"India-i January 26, 1950 nü constitution agizük aser republic ama aküm. Ajisüaka Manipur nungbo July 26, 1947 nü constitutional act mapa kuma tenzüka liasü. Iba ajanga Indian constitution magizük dang Manipur nungbo ozüngren aser ketdangsubaren balaka tenzüker liasü" ta parnoki metetdaktsü.

Manipur nung 1948 nung democratic elections agi aser iba ajanga sorkar aküm. Southeast

Asia nung democracy ajanga tentetba sorkar mezünpur linüktem rongnung Manipur ka liasü. 1948 elections nung voter aser candidate ajakji Manipur nung chichiba sensotem liasü aser iba ajanga linük balaka ta asüba jangjatsü ta ASUK-isa ashi.

Item putiotsü kulitem nung ajemdaker Manipur nungeri October 15 nü Black Day amongtsü ayongzükter ta parnokisa ashi.

Iba tenokdangba kübok fire stations, water departments, media houses, medical facilities, religious & ritual ceremonies amala essential services madener ta ASUK-isa shisem.

CM Lalduhoma den senden amenba sülen Mizoram nung mokdang athir

Aizawl, October 13, 2024 (Agencies): Mizoram Commercial Vehicle Union (MCVU)-i petrol aser diesel jenjang ajemang ta takhangba agüja October 14 nungi lungkak aittsü aliba thinenogo.

MCVU lennirtem aser Chief Minister Lalduhoma nunger senden ka amendang Lalduhoma-i October 16 nung Cabinet senden amentsü aliba tashi ataa liang ta ashiba sülen iba lemtet agi.

Chief Minister-isa senden nung state PWD aser construction companies dang

national highways aser intrastate highways mejungi alibatam yanglushiba mapa tekaraba nung inyaktsü ashitsü mulungtep.

Mizoram sorkari September 1 nungi petrol aser diesel litre shia nung Rs 4 ajungketa liasü. Social infrastructure aser services cess atema litre nung Rs 2 aser road maintenance atema Rs 2 talila agitsü ta sorkari lemtet.

Ajisüaka, truck gari kiburtem National Highway -306 talisa Sairang-Darlui sector kanga mejungi raksaa aliba anema Hombur nungi lungkak aittsü lemtet ka agi.

NH-306 ya Mizoram atema lenmang tongtiba lir aser iba agi Assam ajanga linük den sendakteper.

Sairang-Darlui sector kanga mejungi lir aser truck gari anirtem atema lendong lir ta Mizoram Truck Driver Association, Mizoram Tipper Association of Driver and Owner aser Mizoram Indane Driver Welfare teloktemi metetdaktsüogo.

NH nung truck garitem tiptema senzütsüsa lenmang meyanglu tashi mesenzütsü ta parnoki ashi.

BSF-i Tripura nung Bangladeshi nunger 7 apu



Guwahati, October 13, 2024 (Agencies): Border Security Force (BSF)-i Honibarnü Tripura kübok tesem balala nung Bangladeshi nunger tenet puogo.

South Tripura district kübok Shyampara Border Out Post (BOP) nung BSF sepaitemi Bangladeshi nunger pezü apu. Osang tejangja ka angazükba

sülen tetsür ka dena nisung pezü arnts adena India telungi aittsü lia apu.

Parnok dang asüngdanya asü dang parnok Bangladesh nung Chattogram district nungi aruba ta nangzük.

Sepahijala district nungsa Anandpur BOP anasa Bangladeshi nunger ka apu.

Pa ket nung India sen Rs 3,000 aser Bangladeshi taka 3,600 bena aliba ngutetogo. Pa ya Dhaka district nungi lir.

North Tripura district kübok Dharmanagar aser Sabroom BOP nunga BSF sepaitemi Bangladeshi nunger ana apu. Tena ket nung India sen Rs 5,540 bena liasü.

Pakistan: Shia-Sunni kin mangatettep nung nisung 16 tepset

Islamabad, Mongputeni/October 13 (Agencies): Pakistan northwest len telok ana mangatettep adokba sülen tetsür asem aser tanur ana densema nisung 16 tepsetogo, ta ketdangsürtemi metetdaksü.

Pakistan nung Khyber Pakhtunkhwa province kübok Kurram district nung ita aika Sunni aser Shiite Muslim kin raratepa arudar.

Kurram, koba taoba mapang semi-autonomous tesem ka liasü, iba tesem nung Sunni aser Shiite kintem tsüngda azütokshi lendong aiben ataloka arudar aser kümtem tsüngda nisung taküm aika samaogo.

Honibarnü paramilitary sepaitem teküzmükba kübok Sunni nung convoy ka senzua aliba mapang maka liasü, ta Kurram administration ketdangsür tejen kati AFP dang ashi.

“Iba lendong nung tetsür asem aser tanur ana densema nisung 14 tepsetogo aser nisung trok yirugo,” ta paisa ashi.

Lendong atalokba sülen frontier police-i telangzüba agüja convoy amaker ana tepset, shirnok Shiite kin nungi liasü, ta ketdangsüri ashi.

July aser September ita raratepba sülen nisung aika tepsetogo aser tribal council-i ceasefire ka asoshi

ayongzükba sülenang iba rara anena liasü.

Kasa mapang nung ketdangsürtemi ano tenangzüktepba ka yanglutsü atema merangdanga arudar.

Pakistan nung kin aser kibong tsüngda mangatettep kanga adoker.

Ajisüaka item mangatettep ya talisa Khyber Pakhtunkhwa kübok kinük nung aliba tesemtem nung tesashiba ataloker, kong loktitemi sobaliba kanga metsünga reta benshir aser iba sülen anidaker.

Pakistan nung Sunni Muslim nungertem timba lir aser linük nung Shiite nungertem küm aika kanga mezüngmeshia arudar.

MULUNGNEN O



ASO: 25.01.1932

ASÜ: 04.10.2024

Onoki teti meima aliba ojala Yajenlemla Jamir (Mopungchuket), akümüli tembangba anogo nungi tenzükter onok mangyim nüktzü densa nung alidang kija, kibong, arogo, yimden aser lokti balala shirnokisa sarasadem, rongsen, nübu aser shisatsü agi yariogo, nenok ajak dang kümrem pelaba lemsateper.

Nenok mapa tajung asoshi onoki kecha meyipa magütsütetaka asen tematiba Tulusang Tsüngremi moajang ta onoki sarasademtsür.

Chirnur, Semchirsemmur aser Kidangkimang

Harris-i la indang medical report sangdongogo



Washington, Mongputeni/Oct. 13 (Agencies): Democratic Party nungi US tir asoshi toktepla aser tang Vice President Kamala Harris-i lar doctor-i la temang anema lir aser tematiba office nung amentsü temsüa lir ta züluba shiti ka Honibarnü saya, koba la den toktepsang Donald Trump den meputeper.

White House ajanga prokshiba memo nung vice president indang doctor Joshua Simmons-i ashiba agi, Harris tesüsa temang reprangba ya April ita liasü aser la kanga mazüngi liaka aser seasonal allergies aser sporadic hives liaka temang junga lir, chiyongsü tajung achir, moko mamshir aser yi khen-khen terara ajemer.

“Chief Executive, Head of State aser Commander in Chief densema Tir mapa takok ngua inyaksü nüngdakba tashi aser tekolok shisatsü la dak lir,” ta doctor-i zülü.

Arishi küm 59 tain Harris ya White House atema arishi küm 78 tain Republican telok nungi Trump den tokteper. Trump-i temang tendangba record sangdongtsü memulungba yong lai Honibarnü yimjak nung la indang medical osang sangdong, ta Harris den yariteper kati ashi.

Trump-i pa indang medical report tejangja agütsütsü

memulungba ya pa dak ochimashi aliba tatishitsü tassenbaji lir, ta Harris-i ashir.

“Par team-i America nübur nem pa indang ajakbo memetdaksüner,” ta Harris-i osangbener dang shir la North Carolina-i tayimtsü ka nung ao.

Mezüng tepsettsü merangba sülen pa temang reprangsang medical doctor Ronny Jackson-i agütsüba reports tejangja aser pa indang jurila doctor nungi agütsüba osang Trump-i mulungsoa lemsatepogo, ta Trump Campaign Communications Director, Steven Cheung-i sangdong ka nung ashi.

“Ajaki pa Commander in Chief asütsü tetemsü ta shiteter,” ta Cheung-i ashi.

Trump ya US tir asoshi toktepba candidate tem rongnung tambosang akumba sülen Harris campaign-i taoba tir indang arishi küm tali jangjatsü matateter. Trump den o intepba nung junga shilem magitetba sülen arishi küm 81 tain Tir Joe Biden-i iba tetoktepba menden aitsü.

Trump den medemdangra Harris ya kanga agi tanutsü aser tekolok shidak lir, aser Trump ya tambo aser aiben onük shidak mejembitet aser tena tsüngta ochishiba tsütsü tepila aliba amala kuli nung ajemdaker telemtetba magi

aliba voter temi la shimtsü südi ta amanger.

2018 küm Trump ya tir inyakba mapang White House doctor kati pa temang shidak dang lir saka temang tuozük tera ajemtsüla aser anogoshi exercise agitsüla ta shia liasü.

Simmons-i ashiba agi, Harris indang allergies ya kanga tesashi masü aser mozü shidak agia kanga junga anepalua aser azüoka arur.

La temang nung ara (urticaria mesüra hives) ya kanga ajema lir aser ibai inyaksangshi tejangja kar ajanga adokdaksür masü aser danga symptoms den sendaktepa mali aser antihistamine treatment agiba ajanga temang tajungba akumer.

Harris ya tesüiba küm asem tashi allergen immunotherapy agia arur aser la indang allergy kanga tajungba kumogo, anungji mapang shia nasal spray amshiba dak alaka danga medication menüngdak, ta pai ashi.

Harris-i contact lenses agir. Lai kinunger tera reprangdangra la tetsü ya colon cancer lir. Saka Harris ya tanü tashi kanga kumdanga alir aser mapang shia temang tendanga anepalua arur, ta pai ashi.

Netanyahu-i southern Lebanon nung UN peacekeepers agentsü ashir

Jerusalem, Mongputeni/Oct. 13 (Agencies): Israel Ato Kilonser Benjamin Netanyahu-i UN Secretary General Antonio Guterres dang southern Lebanon nungi tangsa peacekeeping forces agentsü ashi.

“Mr Secretary General, UNIFIL sepaitem lendong ajurutsü aliba tesem nungi agienang. Ibaji tangsa inyaksüla,” ta Netanyahu-i video sangdong ka nung ashiba pa indang office-i prokshia liasü.

Iran-i Israel amakba sülen ita tetenzüklen Israel indang Foreign Minister Israel Katz-i Guterres ya ‘persona non grata’ (pela magizüksü nisung) ka ta sangdonga liasü.

Lebanon nung United Nations indang peacekeepers dak amakba atema UK densema linük 40-i khukhua aitsü. Brehostibarnü Israel nung indang tanks temi injang khaloktsüba ajanga observation tower nungi Indonesian peacekeeper ana tsüka yirua liasü.

Hokulbarnü Israel Defense Forces-i Naqoura nung Sri Lanka sepai ana yiruba ya par mapa ta nangzük aser iba tatalokba bushisüngdangtsü ashi.

Ano south tsütsü Hokulbarnü prangbong-injang amshia

khatepba mapang ano peacekeeper ka yiru, ta United Nations-i Honibarnü ashi.

Linük balala lungjemer social media X nung joint statement ka agütsüba nung United Nations Interim Force in Lebanon (UNIFIL) dak amakba tangsa anentsüla aser kanga junga bushisüngdangtsüla, ta ashi.

Kasa mapang IDF temi Lebanon nung arütsü nungi meter 200 shi pilar mosque ka densema tesem tuluka poksatsü. Israel-Lebanon arütsü nung aliba Zahajra aser Dhayra yimtsüng south tsütsü Ahel El-Quran Mosque nung bomb ana pokloksü ta ashir.

Cabinet meeting ka nung jembidang, Israel sepaitemi UNIFIL dang ainshitsü aiben ashi saka memulungi Hezbollah kiralongrar nem “human shield” agütsür, ta Netanyahu-i ashi.

“Nai UNIFIL sepaitem anizüker aotsü memulungba ajanga parnok Hezbollah indang hostages akumer. Ibaji ajanga parnok aser ozü sepaitem takum lendongi yoker. UNIFIL sepaitem yiruba atema sasar aser iba ama majurutsü asoshi onok tashi nung aliba ajak amshia inyaker. Saka lendong aliba tesem nungi parnok anizüker aotsü ya tajungba,” ta pai ashi.

Sri Lanka sorkari ken o kar ano bushisüngdangshitsü tuyu

Colombo, Mongputeni/October 13 (Agencies): Sri Lanka nung sorkar tassenbai police dang ken o tongtibang kar ano bushisüngdangshitsü tetuyuba agütsüogo, kong 2019 küm Easter Sunday nü kiralongrartemi amakba aser Tamil minority community osangbener ka tepsetba ken o densema lir.

National People’s Power shirnoki taoba ita tir election koka liasü, parnoki taoba mapang mebeneteti aliba ken o tem tanaben bushisüngdangtsü tenangzükba agüja liasü.

Public security ministry-i bushisüngdang nung

metongmejen alibatem jangjatsü atema jenjang agiogo.

“Ministry-i acting police tekolakba dang item ken o tem b u s h i s ü n g d a n g t s ü metetdaksüogo,” ta Police otongdar Nihal Thalduwa-i Honibarnü ashi.

Ken o tanaben bushisüngdangtsü aliba rongnung 2015 küm Central Bank bonds agütsüba ken o densema lir, koba taoba tir Ranil Wickremesinghe-i aniba sorkar dak tai tongloksür lir. Maneni 2019 küm Easter Sunday nü kiralongrartemi maka nisung 270 tepsetba ken o dena tanaben bushisüngdangtsü.

Catholic church-i, iba tatalokba dak sendakba nung jenjang tesashi agitsü takhangb agüja arudar aser ashiba agi, iba tatalokba ya yimden yimsütsüba dak sendaka lir aser taoba sorkari mimbanga ayutsü meranger.

Ano tanga ken o tem rongnung 2005 küm of Tamil minority community osangbener D Sivaram tepsetba aser 2006 küm Tamil minority academic ka pur oa samaba ken o densema lir.

Maneni 2011 küm Jaffna yimtiba nung political party activist ana samaba ken o dena bushisüngdangtsü.

Mokokchung nung Basketball Coaching Camp akatsü

Mokokchung, October/ Mongputeni 13 (TYO): Nagaland nung Basketball asaya ajungkettsü nükjidong nung Basketball Association Mokokchung District aser Nagaland Basketball Association semteper Mokokchung nung Basketball Coaching Camp ka Imkongmeren Sports Complex

nung basketball asaya jangratem asoshi akatsüta iba coaching camp ayonger ajanga metetdaksüogo.

Iba Coaching Camp ya October 19 nungi December 21 tashi anogo melentepa agitsü aser arishi küm 7 nungi temapur tetsür aser tebur adentsü akokta kasa sangdong nungsa ashi.

Basketball asaya nung FIBA-certified coach Imyangluba Lemtur ajanga iba Coaching Camp nungya tesayuba agütsüsü, anungji tejangrartemi agüja aliba number 9856881411 mesüra 7005377858 nungya tongteprateptsü. Iba den tenüng züluoktsü sen Rs,1500/- alitsüta metetdaksü.

Asian TT Championships: India team-i medal asem angu

Mongputeni/October 13, 2024 (Agencies): Asian Table Tennis Championships nung India team-i medal asem nguogo, kong otsüsüsüsa tetsür tarep asaya nung bronze medal ka anguba densema lir.

Tetsür tarep asaya nung Ayhika Mukherjee aser Sutirtha Mukherjee nati mimlai kanga junga asaya atu saka Honibarnü semifinal nung tsüka liasü.

World No. 15 tarep yagi taoba küm Asian Games nung bronze medal ka anguba mapang world championship tesüsüsa koker aliba China team koka liasü, ajisüaka tena taküm iba asayamung nung semifinal nung Japan tsür Miwa Harimoto aser Miyuu Kihara nati 4-11 9-11 8-11 agi

koka liasü. Tarep ana tsünga minute 30 majung asaya liasü.

Iba masüdag India tsür ana yagi quarterfinal nung South Korea tsür Kim Nayeong aser Lee Eunhye na koka Asia asayamung nung India asoshi mezüngbuba tetsür tarep asaya nung medal ka angutsü jangja aküm.

India tetsür team-i team asaya nunga otsüsüsüsa bronze medal ka nguogo.

Manika Batra, Ayhika Mukherjee, aser Sutirtha Mukherjee nungeri 1972 küm iba asayamung tenzüka sülen India asoshi tetsür team category nung mezüngbuba medal ka ngua liasü. Ajisüaka parnok semifinal nung Japan-i 3-1 agi koka liasü.

Tebur asaya nung India

nunger asayar Achanta Sharath Kamal, Manav Thakkar, aser Harmeet Desai nungeri semifinal nung Chinese Taipei 0-3 agi makokba sülen bronze medal ka nguogo.

Tebur kija asaya nung Manav Thakkar aser Manush Shah na pre-quarterfinals nung tsüka liasü.

World No. 60 Thakkar, shibai mimlai lia South Korea nunger world No. 14 Jang Woojin koka liasü, pa Hong Kong nunger asayar Baldwin Chan-i 4-11 4-11 8-11 agi tsükdakja liasü.

Kasa mapang nung Manush-i, Chinese Taipei nunger asayar Lin Yun-Ju den kanga meranga asaya saka 8-11 5-11 11-7 11-6 12-14 agi mekoki liasü.

Uthappa lenisüba nung India team Hong Kong sixes asayamung asayatsü



Mongputeni/October 13, 2024 (Agencies): November 1 nungi 3 tashi asayatsü aliba Hong Kong Cricket Sixes tournament nung India team-a asayatsü renema lir. Taoba mapang India team nungi asayar Robin Uthappa lenisüba nung India team asayatsü atema shimogo.

Asayar trokrok asayaba tetoktepba nung Uthappa den külemi Manoj Tiwary, Shabaz Nadeem, Shreevats Goswami, Stuart Binny, Kedhar Jadhav, aser Bharat Chipli nungera team nung züngoksemogo.

Taküm iba asayamung nung team 12-i shilem agitsü kong India tsükchir Pakistan densema lir. Anogo asem asayatsü aliba asayamung nung shilem agitsü aliba team tem rongnung Australia, Bangladesh, England, Hong Kong, Nepal, New

Zealand, Oman, South Africa, Sri Lanka aser United Arab Emirates densema lir.

Iba asayamung ya 1992 küm tenzüka saka 2017 küm sülen masayai aküm, anungji 2024 küm asayatsü aliba asayamung ya küm 7 sülen mezüngbuba asayamung asütsü.

Sachin Tendulkar, MS Dhoni, Shane Warne, Wasim Akram, Shoaib Malik, Sanath Jayasuriya, Anil Kumble, Umar Akmal, Glenn Maxwell aser Damien Martyn nungeri taoba mapang iba asayamung nung shilem agiogo aser tang tashi nung Pakistan, England aser South Africa nungeri takok tajungba ngur lir.

India team-ia 2005 küm iba asayamung kokogo aser Sri Lanka, Australia aser West Indies nungeri iba asayamung ya koker lir.

Babar, Afridi na Pakistan team nung meshim



Mongputeni/October 13, 2024 (Agencies): Taoba mapang Pakistan captain Babar Azam and pace Shaheen Afridi na England den tanabuba aser tasembuba Test asaya atema Pakistan team nung mezüngoksem.

Multan nung mezüngbuba Test nung innings ka agi tamakok anguba sülen Pakistan Cricket Board-i tanungba Test asaya ana atema team sangdongogo, kong Babar aser Shaheen na densema maliasü.

Kasa mapang nung Shan Masood nem maneni captain mapa agütsüogo.

“Onoki Babar Azam aser asayar tanga kar anisüngzükdaksütsü telemteba agiogo,” ta selector Aaqib Javed-i ashiba Pakistan Cricket Board sangdong ka ajanga metetdaksü.

Babar-i Test innings 18 tashi nung half century ka danga yanglua mali aser England den mezüngbuba Test asaya nung run 30 aser pongu dang yanglua liasü. Pacer Naseem Shah aser keeper-batter Sarfaraz Ahmed nata England den tanungba Test ana atema anisüngzük agütsüogo.

“Item asayartem nem anisüngzük agütsüba ajanga parnok fitness tajungba akümtsü, pei sasa dak taliba temulung lemteta akümtsü aser temaba jenjang nung meyipa arua asayatetsü ta tamang akar.

“Parnok asayar tajungtiba rongnung densema lir aser parnoki Pakistan cricket atema teyari aika agütsütetsü. Parnok anisüngzükdaksüba mapang takok tashi teyari agütsüsü onok bendang agütsür lir, ajita asünungdang parnok tashi taitba

meypa arutettsü,” ta Javed-i ashi.

Team nung asayar tongtibang pezü ya Haseebullah, Mehran Mumtaz, Kamran Ghulam (all uncapped), fast bowler Mohammad Ali aser off-spinner Sajid Khan nungeri melenogo, ta board-isa metetdaksü.

Tanabuba aser tasembuba Test asaya ya Multan aser Rawalpindi na nung asayatsü lir.

Pakistan squad:

Shan Masood (captain), Saud Shakeel (vice-captain), Aamir Jamal, Abdullah Shafique, Haseebullah (wicket-keeper), Kamran Ghulam, Mehran Mumtaz, Mir Hamza, Mohammad Ali, Mohammad Huraira, Mohammad Rizwan (wicket-keeper), Noman Ali, Saim Ayub, Sajid Khan, Salman Ali Agha and Zahid Mehmood.

Shanghai Masters: Sinner-i final nung Djokovic kokogo

Mongputeni/October 13, 2024 (Agencies): Deobarnü Shanghai Masters final nung Jannik Sinner-i Novak Djokovic koka pai pa indang career nung title 100buba akoktsü aliba nokdangogo.

World number one Sinner, shibai taküm kanga junga asaya arudar, pai final nung 7-6 (7-4) 6-3 agi arishi küm 37 tain Serbia nunger asayar ya koka liasü.

Connors (109) aser Roger Federer (103) na sülen career nung asayamung 100 akokba asayar tasembuba akümtsü atema Djokovic meranga asaya, ajisüaka pa Sinner-i nokdangogo.

Kasa mapang nung arishi küm 23 tain Italy nunger asayar Sinner-i taküm kanga junga asaya arudar aser pai tang tashi nung asayamung tenetbuba kokogo.

Sinner-i taküm akokba asayamungtem rongnung Australian Open aser US Open na densema lir aser pai 2024 küm asaya 71 nungi 65 bo kokogo.

Asaya nung tanabuba set



Jannik Sinner

nung Sinner-i game pezübuba nung Djokovic indang serve ka break asü, koba iba asaya nung kanga tongtibang liasü. Tena tsünga ghonda 1 ser minute 37 asaya liasü.

Mezüngbuba set nungbo asayar anapronglai pei service break mesüdaktsüi kanga toktepa asaya, ajisüaka tiebreak asaya Sinner-i amokbanger asaya-a mezüngbuba point angutsü atema pai Djokovic indang service break asü aser pa 5-1 agi tejakdang aküm aser asaya koka liasü.

Tanabuba set nung Sinner-i game pezübuba nung Djokovic indang serve break asü aser iba sülen pa indang serve break mesüdaktsüi asaya koka liasü.

BILEMDANGANG

“Akümtsübuji langa alirtem atema lir.”